

**Pemimpin DAP beri kata dua kepada PAS, bersama 'pengkhianat' atau Pakatan
Malaysian Insider
Aug 14, 2014**

Ahli Parlimen Klang daripada DAP Charles Santiago memberi kata dua kepada PAS untuk menyatakan pendirian, sama ada menyokong pengkhianat Tan Sri Abdul Khalid Ibrahim atau Pakatan Rakyat (PR).

Santiago berkata PAS perlu berhenti daripada melengah-lengahkan masa pada ketika krisis menteri besar Selangor semakin meruncing.

"Mereka perlu menyatakan pendirian sama ada mahu bersama PR atau tidak," katanya dalam satu kenyataan hari ini.

"Kami sebagai rakyat perlu tahu kesetiaan PAS," katanya.

Beliau juga mempertikaikan kesetiaan PAS apabila Ahli Dewan Undangan Negeri (Adun) menghadiri mesyuarat bersama Khalid semalam dan masih kekal sebagai Ahli Majlis Mesyuarat Kerajaan Negeri (exco).

"Sebarang alasan diberikan kepimpinan PAS menyokong kehadiran exco adalah naif dan tidak masuk akal," katanya.

Semalam, empat exco PAS tetap menghadiri mesyuarat bersama Khalid walaupun sebelum itu DAP dan PKR menggesa supaya tidak menghadirinya.

Santiago menyifatkan imej Khalid sudah hancur kerana pengkhianatannya.

"Pada masa saya menulis ini, imej dan reputasi Khalid sudah berkecai, angkara keangkuhan dan pengkhianatannya kepada parti dan PR yang

melantiknya sebagai menteri besar Selangor," katanya.

Beliau juga mencabar Khalid supaya mengusulkan undi tidak percaya ke atas dirinya dan tidak bermain politik kotor secara bersembunyi.

"Tapi untuk masa ini, Khalid sudah mengkhianati para pengundi," katanya.

Kemelut di Selangor semakin meruncing selepas Khalid mengambil langkah drastik memecat exco Selangor daripada PKR dan DAP, serta menegaskan beliau masih menteri besar yang sah selepas mendapat perkenan Sultan Selangor.

Susulan perkembangan tersebut, PKR dan DAP mendesak PAS supaya menyatakan pendirian mereka dengan segera tanpa perlu menunggu mesyuarat 17 Ogos ini. – 14 Ogos, 2014.

Hakcipta © 2013 The Malaysian Insider

Source:

<http://www.themalaysianinsider.com/bahasa/article/pemimpin-dap-beri-kata-dua-kepada-pas-bersama-pengkhianat-atau-pakatan>